




Ich halte aber/das kein feiner Exempel-
buch oder Legenden der Heiligen/auff erden
komen sey oder komen möge/denn der Psal-
ter ist. Vnd wenn man wünschen solt/das
aus allen Exempeln/Legenden/historien/
das beste gelesen vnd zusammen gebracht/
vnd auff die beste weise gestellet würde / so
müßte es der jetzige Psalter werden.

Denn hie finden wir nicht allein / was
einer oder zween Heiligen gethan haben /
sondern was das heupt selbs aller Heiligen
gethan hat / vnd noch alle Heiligen thun /
Wie sie gegen Gott / gegen freunden vnd
feinden sich stellen/Wie sie sich in aller fahr
vnd leiden halten vnd schicken / Vber das /
das allerley Göttlicher heilsamer lehre vnd
gebot darinnen stehen.

Vnd solt der Psalter allein deshalben
thwer vnd lieb sein/das er von Christi ster-
ben vnd aufferstehen / so klerlich verheisset /
vnd sein Reich vnd der gantzen Christenheit
stand vnd wesen fürbildet/das er wol möch-
te eine kleine Biblia heissen / darin alles
auffs schönest vnd kurtzest/so in der gantzen
Biblia stehet/gefasset/ vnd zu einem feinen